

Sedrun / Lugano, ils 20 d'ust 2025

Communicaziun da pressa

Sedrun obtegn il label „Best Swiss Villages“

Suenter che Breil ha igl onn 2017 survegniu sco secunda vischnaunca en Surselva il label label "Best Swiss Villages" che vegn surdaus dall'Uniun dils pli bials vitgs svizzers. Sedrun entra pia ella reit cun auters vitgs svizzers enconuscents sco Morcote e Gruyères e grazia all'uniun da tetg internaziunala era cun vitgs sco Vernazza ella Liguria e Riquewihr ell'Alsazia. Tujetsch ei l'otgavla vischnaunca grischuna che separticipescha all'uniun e Sedrun il tschunavel vitg romontsch.

Martin Cavegn, president communal da Tujetsch: "La vischnaunca da Tujetsch croda en egl – buca mo entras sia natira magnifica che circumdescha nus, mobein cunzun entras ils vitgs ed uclauns che characteriseschan nossa vischnaunca e nossa vallada: Tschamut, Selva, Dieni, Rueras, Sedrun, Surrein, Cavorgia e Bugnei. Mintga part ha siu agen character, si'atgna historia ed ina bellezza ch'ins vesa cun ir tras las gassas ni cun schar girar l'egliada sur ils tetgs.

Casas, stallas e baselgias veglias ein buca mo constructs freids da crappa e lenn – ellas fan part da noss'identitad. Ellas raquantan dallas generaziuns avon nus che han baghegiu, cultivau e dau vinavon cun gronda devoziun. Mantener questa ierta ei per nus buc in'obligaziun, mobein in'expressiun da respect ed amur per nies dacasa. Il maletg dil vitg che renda nus ozildi aschi loschs, ei in scazi che nus lein tgirar era per las proximas generaziuns.

E tuttina savein nus: mo tgi che resta aviarts pil niev, resta dynamics. Innovaziun, progress ed ideas curaschusas s'audan tier gl'avegnir da nossa vischnaunca, exact sco il manteniment da nossas ragischs. Sche nus accordein la tradiziun e la modernitad, creein nus in Tujetsch ch'ei ferm – per nus indigens, per ils hosps e per quels che vulan anflar cheu patria. Aschia vulein nus mantener nos vitgs ed uclauns: dynamic, bi e che semidan cuntinuadamein."

Kevin Quattropani, president dall'Uniun dils pli bials vitgs svizzers: "Jeu hai grond plascher che la vischnaunca da Tujetsch separticipescha a nossa reit. Sedrun ed ils uclauns vischins porschan numerusas pusseivladads d'exploraziun. Grazia alla situaziun geografica completescha questa vischnaunca a moda perfetga nos dus ulteriurs vitgs Breil e Hospental, bein contonschibels era cun mieds da transport public e possibiliteschan aschia in turissem pli persistent."

Reit internaziunala


L'uniun "Ils pli bials vitgs svizzers" ch'ei vegnida fundada igl onn 2015 a Lugano ha la finamira da presentar ils scazis pigns dalla Svizra e dil Liechtenstein e da render enconuscents ils tals sin plaun naziunal ed internaziunal. L'uniun ei commembra dalla federaziun internaziunala "The most beautiful Villages of the World" che reunescha e representa la Frontscha, l'Italia, la Belgia, la Spagna, la Tiaratudestga, La Bosnia-Herzegovina, il Libanon, il Canada, il Giapun, la China e la Svizra.

L'uniun svizra ha era in partenadi culla reit austriaca "Kleine Historische Städte", cun 17 vischnauncas ell'Austria. Oz fan en tut 52 vischnauncas en 18 cantuns part dall'uniun svizra. 47 vitgs cun il label "Best Swiss Villages" e 5 marcaus historics cun il label "Swiss Historic Towns". Per saver far part dalla reit ston ils loghens esser specialmein bials ed esser situai en ina cuntrada extraordinaria. Autenticitad ed aspect historic ein medemamein criteris fundamentals, sco era la voluntad dalla vischnaunca d'interconnectar. Dapi gl'onn 2022 ei l'uniun partenaria en in program "Inamurus en bials loghens" dad 80 loghens d'impurtonza naziunala (ISOS) e dapi gl'onn 2023 el program "Svisstainable" per turissem persistent da Svizra Turissem. Cun varga 22'000 followers sin Instagram ei gl'account "swissvillages" ina vitrina sociala eccellente per las 52 vischnauncas commembras.

Fetg beinvesida ei era l'applicaziun per iOS ed Android che vegn duvrada da varga 12'000 utilisaders e che stat a disposiziun en quater lungatgs.

Ils 47 commembers dil program „Best Swiss Villages“:

Albinen (VS) Arlesheim (BL) Ascona (TI) Avenches (VD) Bergün (GR) Bosco Gurin (TI) Breil (GR) Büren an der Aare (BE) Bursins (VD) Dardagny (GE) Erlach (BE) Ernen (VS) Evolène (VS) Gersau (SZ) Giornico (TI) Grandson (VD) Grandvillard (FR) Grimentz (VS) Grüningen (ZH) Gruyères (FR) Hospental (UR) La Neuveville (BE) Le Landeron (NE) Lichtensteig (SG) Luthern (LU) Madulain (GR) Morcote (TI) Moudon (VD) Muggio (TI) Niedergesteln (VS) Planken (FL) Poschiavo (GR) Romainmôtier (VD) Rougemont (VD) Saillon (VS) Saint Saphorin (VD) Saint Ursanne (JU) Schwellbrunn (AR) **Sedrun (GR)** Simplon Dorf (VS) Splügen (GR) Soglio (GR) Triesenberg (FL) Trogen (AR) Tschlin (GR) Valangin (NE) Yverne (VD)



Per ulteriuras informaziuns

Martin Cavegn, President communal da Tujetsch;

martin.cavegn@tujetsch.ch , tel. 079 209 52 52

Kevin Quattropani, president dall'uniun «Ils pli bials vitgs svizzers»;

kevin.quattropani@swissvillages.org , tel. 076 326 55 00